

Awe den Parlamento, Wever-Croes ta contesta pregunta tocante interferencia den Ministerio Publico

Dialuna 4 di november, Gobierno di Aruba a yama un Conferencia di Prensa pa elabora riba e reunion den Parlamento awe, den cual a yama Prome Minister, Evelyn Wever-Croes pa duna cuenta riba interferencia den Ministerio Publico.

Durante e conferencia, Wever-Croes a indica cu ta reina hopi confusion y preocupacion entorno e reunion aki. E mandatario a splica cu ta trata di un reunion unda a yam'e pa duna cuenta riba "metemento directo" den Ministerio Publico, cual ta palabranan exacto cu Parlamentarionan Marisol Tromp (MAS), Miguel Mansur (Accion21) y Aquanette Gunn (MAS) a usa den nan peticion pa e reunion aki. Segun e comunicado di gobierno, esaki a causa bastante confusion y tension den comunidad y aki Prome Minister a splica kico a causa tanto tension.

Desde 9 di september na Aruba tin un situacion politico tenso na e momento cu Gobierno a cay pa motibo di disputa tocante e presidencia di Parlamento, unda na lugar di renoba e presidencia di Edgard Vrolijk (MEP), parlamentarionan di Raiz y di oposicion a vota pa Raymond Kamperveen (Raiz) como presidente. "E disgusto a bin ora cu na un manera inusual un partner di coalicion ta cera alianza y busca sosten cerca oposicion cu entre nan tin e parlamentario condena pa husticia pa 4 aña, y asina como mayoria a baha e presidente di parlamento e tempo ey, señor Edgard Vrolijk," Wever-Croes a bisa.



E disgusto a sigui crece dia 15 di october ora cu a yama Minister Endy Croes den parlamento y a bah'e como minister despues di un mocion di desconfianza "sin base, motibo of prueba pa bah'e."

E comunicado ta indica cu no tin ningun investigacion den su contra y Minister Endy Croes a actua segun regla na momento cu a constata irregularidadnan den un fundacion cu ta cay bao su ministerio. Ta trata aki di e caso di Stichting Sportsubsidie Aruba, den cual luna pasa a duna retiro na director Kenneth Vrolijk despues cu a sali na cla cu tabata tin irregularidadnan den e fundacion.

Segun e comunicado di gobierno, locual a haci e situacion mas tenso ainda ta cu durante e reunion di 15 di october, oposicion a declara "na un forma hopi contundente y yena cu rabia" cu Minister Endy Croes ta e prome di

e ministernan, y cu nan lo yama tur e ministernan y un pa un lo baha nan.

"Esaki a intensifica e disgusto y tension den comunidad, cual ainda na e momentonan aki ta sinti esey. P'esey mi a yama e Conferencia di Prensa aki pa duna e informacion corecto y pasa e mensahe na comunidad di Aruba pa keda tranquil. No tin motibo pa tanto tension ni panico. Tin un reunion yama pa di 5 di november di caracter informativo unda parlamentarionan lo haci pregunta y ministernan ta contesta. Mi persona hunto cu colega Rocco Tjon lo ta presente pasobra e tema ta trata di metemento den Ministerio Publico, y Minister di Husticia tin e responsabilidad di sali na defensa di Ministerio Publico. Mi ta pidi comunidad un bes mas pa keda tranquil paso e informacion cu nos ta bay comparti riba 5 di november ta importante y comprondiendo bon, por mira cu no tin ningun motibo di preocupacion", Prome Minister a expresa.

A cambia di "reunion publico" pa "encuentro publico" Manera menciona, awe ta tuma luga e reunion den Parlamento di Aruba den cual lo cuestiona prome minister demisionario Evelyn Wever-Croes pa su supuesto interferencia den investigacionnan di Ministerio Publico.

E mandatario mes a splica durante un conferencia di prensa siman pasa, cu el a ricibi e invitacion pa e reunion aki dia 4 di october for di presidente di Parlamento, Sr. Raymond Kamperveen. E peticion pa e reunion aki a bin for di parlamentarionan



Marisol Tromp, Aquanette Gunn y Miguel Mansur.

Na varios ocasion e parlamentarionan a cuestiona e supuesto interferencia di e prome minister demisionario den investigacionnan di Ministerio Publico y a hasta referi especificamente na e caso di director di Departamento di DIP.

E reunion awe ta uno cu tin atencion di comunidad, mirando cu informacion a circula indicando cu oposicion a prepara un mocion di desconfianza contra e mandatario cu intencion pa retira e prome minister demisionario.

E informacion aki prome minister demisionario tambe a confirma durante e conferencia di prensa sigurando cu el a wak e mocion di desconfianza aki y cu el a wak "tur e barbaridadnan cu nan a purba di hinca aden."

Sinembargo, na momento cu diahuebs ultimo e convocation pa e reunion den Parlamento a sali oficialmente, por a nota cu a cambia e reunion aki for di un "reunion publico (OV)" pa un "encuentro publico (OB)".

E diferencia entre e dos tipo di reunionnan aki ta cu durante un 'encuentro publico' parlamentarionan no por presenta un mocion di desconfianza. Presidente di Parlamento, Raymond Kamperveen a splica cu a haci e cambio di tipo di reunion pa motibo di seguridad di Parlamento, e miembro- y trahadonan.

Na momento cu a bira conoci cu tin un mocion di desconfianza prepara contra e prome minister demisionario, rumornan a cuminsa circula cu sostenedornan di e lider di MEP lo por presenta na Parlamento e dia di e reunion pa protesta. Teniendo esaki na cuenta, presidente di Parlamento a tuma decision pa cambia e 'reunion publico' pa un 'encuentro publico' pa evita cualkier problema of interrupcion. A pesar cu presidente di Parlamento a ricibi hopi critica pa esaki, incluyendo cu el a "dobla", realidad ta cu e decision aki a muestra su integridad como presidente di Parlamento, ya cu ta demostra cu Kamperveen no a sigui interes politico of di partido, sino cu a para pa orden y estabilidad di Aruba.

Tocante kico por spera den e reunion awe, segun prome minister demisionario Wever-Croes a bisa, e parlamentarionan cu a yama e reunion ta referi na un carta cu Ministerio Publico a manda gobierno. Den e carta, OM ta cuminsa cu informa cu a cera investigacion riba e persona.

Esaki pa e parlamentarionan ta un señal cu e mandatario ta mete den investigacion di Ministerio Publico, pero Wever-Croes ta sostene cu e "no a mete, mi no ta mete, mi no por mete, y ningun hende por mete den Ministerio Publico su investigacion." El a sigura cu el lo bay t'ey na e encuentro cu prueba den man pa desbarata tur mentira.

